

AUGUSTO

SERENISSIMO ET POTENTISSIMO  
PRINCIPI AC DOMINO

D. FRIDERICO

REGI BORUSSIÆ,  
MARGGRAVIO BRANDEN-  
BURGICO, S. R. I. ARCHICA-  
MERARIO ET ELECTORI,

SUPREMO ARAUSIONUM,  
NEOCOMENSIUM ET VALAN-  
GINORUM PRINCIPI,

DUCI GELDRIÆ, MAGDEBURGI,  
CLIVIÆ, JULIÆ, MONTIUM, STE-  
TINI, POMERANIÆ, CASSUBIORUM, VAN-  
DALORUM, MEGALOPOLEOS, UT  
ET CROSNÆ IN SILESIA,

BURGGRAVIO NORIBERGENSI,  
PRINCIPI HALBERSTADII, MINDÆ,  
CAMINI, VENEDORUM, SUERINI, RACE-  
BURGI, FRISIÆ ORIENTALIS,  
ET MOERSIÆ,

COMITI HOHENZOLLERÆ, RUPINI, MARCÆ,  
RAVENSBERGÆ, HOHENSTEINII, TECKLABURGI,  
LINGÆ, SUERINI, BURÆ, ET LERDAMI,

DYNASTÆ RAVENSTEINII, TERRARUM  
ROSTOCHII, STARGARDIÆ, LAUENBURGI,  
BUTAVII, ARLAVIÆ, ET BREDÆ, &c. &c.

DOMINO NOSTRO LONGE CLEMENTISSIMO,

VITAM LONGÆVAM, ET IMPERIUM FELIX  
ATQUE GLORIOSUM APPRECAMUR.

# REX SERENISSIME

**H**As TIBI pagellas, raptò super æthera nuper  
Conscriptas Magno de GENITORE, sacras,  
Hæc tenues nostri cultus animique Clientes  
Pignora devota mente manūque damus:  
O jubar, o longo Proavorum sanguine tangens  
Quaslibet antiquas, Rex FRIDERICE, Domos.  
Accipe cum fuis imo de pectore votis  
Mentis & officii parva tributa pii.  
Proximus esse Deo TU cum videare supremo,  
Ipsius in terris utere more Dei;  
Cui, modo sincerâ fuerit si mente voluntas,  
Pauperis arridet parvula mica salis,  
Præque cruentatâ taurorum sanguine terrâ,  
Lancibus aut plenis, vilis arista placet.  
Rex ita Persarum non aspernatus agresti  
Porrectum laticem dicitur esse manu,  
Et tulit hoc miros generoso pectore plausus  
Totius humani, tempus in omne, gregis.  
Ipse TIBI certe se commendabit Avorum  
Splendor, & excelsæ Gentis imago Tuæ,  
Rebus & erepti mortalibus alta PARENTIS  
Gloria, Lethêo non abolenda vado;  
Cujus adumbratum specimen solenniter audet  
Porgere submisso pectore nostra manus.  
Interea Pylios decurre, fluentibus, annos,  
Omnibus ad votum compositisque TUUM:  
Sisque Diis curæ, terræ populisque stupori:  
Sisque, quod es verè, lumen & orbis amor.

Publico Academiae Tuæ nomine

devotissimus cultor

JOANN. HILDEBR. WITHOFIUS.